



Sud Bosne i Hercegovine
Суд Босне и Херцеговине

Broj: S1 3 Iž 043189 22 Iž
Sarajevo, 12.07.2022. godine

Sud Bosne i Hercegovine u Sarajevu, u apelacionom vijeću sastavljenom od sudija Srete Crnjaka predsjednika vijeća, Vesna Trifunović i Dinke Bešlagić Čovrk članova vijeća, odlučujući o žalbi političke stranke Srpska demokratska stranka-SDS sa sjedištem u Istočnom Sarajevu ulica Trg Ilidžanske brigade bb koju zastupa Mirko Šarović predsjednik stranke, izjavljenoj protiv odluke Centralne izborne komisije Bosne i Hercegovine broj: 05-01-07-6-1185/21 od 16.06.2022. godine, zbog kršenja Zakona o finansiranju političkih stranaka, u nejavnoj sjednici održanoj dana 12.07.2022. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je politička stranka Srpska demokratska stranka-SDS odgovorna što u 2019.godini :

- a) finasijska sredstva u iznosu od 186.490,29 KM utrošila mimo finasijskog plana odnosno Programa utroška sredstava za 2019. godinu, čime je prekršila odredbe člana 4 stav 1 Zakona o finansiranju političkih stranaka
- b) nije uspostavila evidenciju nenovčanih donacija koju je ostvarila korištenjem poslovnih prostora bez naknade, čime je prekršila odredbe člana 5 stav 4 Zakona o finansiranju političkih stranaka
- c) nije vodila poslovne knjige na način koji je utvrđen zakonom i drugim propisima u skladu sa zakonom, nije uspostavila tačne i potpune evidencije o prihodima i rashodima, i obavezama, čime je prekršila odredbe člana 11 stav 1 i člana 12 stav 1 Zakona o finansiranju političkih stranaka i nije popunila finasijski izvještaj u skladu sa Pravilnikom o godišnjem finasijskim izvještajima političkih stranaka,

pa joj je na osnovu člana 15 stav 2 i primjenom člana 19 stav 1 tačka a), b), f) i h) Zakona o finansiranju političkih stranaka izrečena :

- 1) za povredu iz stava 1. tačke a) novčana kazna u iznosu od 6.000,00 KM,

- 2) za povredu iz stava 1. tačke b) novčana kazna u iznosu od 1.500,00 KM,
- 3) za povredu iz stava 1. tačke c) novčana kazna u iznosu od 2.500,00 KM i odnosno jedinstvena novčana kazna u iznosu od 10.000,00 KM.

Protiv ove odluke politička stranka Srpska demokratska stranka-SDS blagovremeno je uložila žalbu u kojoj je navela da nije počinila propust neuspostavljanjem evidencije nenovčanih donacija korištenjem poslovnih prostorija bez naknade u Šamcu i Srebrenici. Smatra da su dostavili jasne dokaze sa su u 2019. godini imali važeći ugovor o korištenju poslovnih prostorija sa TP „Galaprom“ ad Šamac koji je raskinut 23.03.2021. godine, te da su dostavljanjem izjave nadležnog načelnika opštine Srebrenica od 26.01.2022. godine dokazali da su oslobođeni plaćanja zakupnine za kancelarijski prostor koji u tom gradu koriste. Stoga predlažu da se žalba uvaži i da se predmet vrati Centralnoj izbornoj komisiji koja će preinačiti odluku o kazni na način da će od utvrđenog iznosa umanjiti novčanu kaznu od 1.500,00 KM koja je izrečana za povredu čije počinjenje žalba osporava.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu jer je ožalbeni odluka donesena na pravilna i potpun način u skladu sa zakonom i podzakonskim aktima.

Žalba nije osnovana.

Prema stanju u spisu predmeta, Centralna izborna komisija BiH je razmatrajući Preliminarni izvještaj službe za reviziju o pregledu godišnjeg finasijskog izvještaja za 2019. godinu političke stranke Srpska demokratska stranka-SDS broj 03-07-6-286/20 iz januara 2021. godine, utvrdila da je politička stranka prekršila odredbe Zakona o finasiranju političkih stranaka. Izvještaj je dostavljen političkoj stranci na izjašnjenje, pa je po prijemu izjašnjenja, Služba za reviziju, sačinila je Konačni izvještaj o pregledu finasijskog izvještaja za 2019. godinu političke stranke Srpska demokratska stranka –SDS.

Navedeno je bilo osnov da Centralna izborna komisija BiH, po službenoj dužnosti, Zaključkom broj 05-1-07-6-1185/21 od 30.12.2021.godine, pokrene postupak utvrđivanja odgovornosti protiv žalitelja, zbog osnovane sumnje da je ova politička stranka u 2019.godini kršila odredbe Zakona o finasiranju političkih stranaka.

U postupku utvrđivanja odgovornosti, Centralna izborna komisija BiH je nakon uvida u Konačni izvještaj utvrdila da je politička stranka Srpska demokratska stranka-SDS finasijska sredstva u iznosu od 186.490,29 KM utrošila mimo finasijskog plana odnosno Programa utroška sredstava za 2019. godinu, nije uspostavila evidenciju nenovčanih donacija koju je ostvarila korištenjem poslovnih prostora bez naknade i nije vodila poslovne knjige na način koji je utvrđen zakonom i drugim propisima u skladu sa zakonom, nije uspostavila tačne i potpune evidencije o prihodima i rashodima, i obavezama.

Politička partija čija je odgovornost utvrđena ožalbenim rješenjem, odluku pobija samo u dijelu tačke b) izreke, odnosno zbog povrede neuspostavljanja evidencije nenovčanih donacija koju je ostvarila korištenjem poslovnih prostora bez

naknade. Stoga je predmet ocjene pravilnosti i zakonitosti ožalbenog rješenja pred Apelacionim vijećem Suda Bosne i Hercegovine, bio samo osporavani dio odluke.

Zakon o finasiranju političkih stranaka (Sl. glasnik BiH br. 95/12 sa izmjenama) u članu u članu 5 stav 4 propisuje obavezu političke stranke da vodi evidenciju o prijemu članarine i dobrovoljnih priloga, izdaje potvrde o prijemu članarine i dobrovoljnih priloga uz obavezu ovlaštenog lica da iste uplaćuje neposrednoma transakcijski račun političke partije u roku od 10 dana od uplate.

Iz stanja spisa proizilazi da politička partija Srpska demokratska stranka-SDS u finasijskom izvještaju za 2019. godinu nije evidentirala nenovčanu donaciju koju je ostvarila besplatnim korištenjem poslovnih prostorija u Šamcu i Srebrenici. I navodi žalbe potvrđuju da je žalilac koristio poslovne prostore u navedenim gradovima u godini za koju se podnosio sporni finasijski izvještaj. Oklonost istaknuta u žalbi da je ugovor o zakupu poslovnih prostorija u Šamcu raskinut dana 23.03.2021. godine, bez uticaja je na odgovornost žalioca, jer je do raskida ugovora došlo istekom godine u kojoj je trebalo u finasijskom izvještaju evidentirati nenovčanu donaciju besplatnim korištenjem tog poslovnog prostora. Bez značaja je i ukazivanje žalbe na potvrdu od 26.01.2022. godine iz koje proizilazi da je žalilac oslobođen plaćanja zakupnine za korištenje poslovnog prostora u Srebrenici. Navedena potvrda žalioca ne oslobadja odgovornosti za propust u ispunjavanju zakonske obaveze da činjenicu o besplatnom korišteću poslovnih prostorija evidentira u poslovnim knjigama i finasijskom izvještaju.

Dakle, činjenice na kojima se zasniva utvrđenje odgovornosti proizilaze iz stanja spisa i primjenjivih odredbi Zakona o finasiranju političkih partija. Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA
S U D I J A**

Sreto Crnjak